




乾隆三十八年十一月浙江巡撫三寶送到汪汝璉家藏
碧溪叢書壹部
制本



碧溪叢書

吳武安公功績記

吳玠字晉卿世居德順之隴干曾祖謙太子大保祖遂
兼太子太傅父辰少保三世皆以義烈聞侯少沈毅尚
氣節長於騎射曉兵法讀書能通大義未冠以良家子
隸涇原軍政和中夏人犯邊緣釁戰立功補進義副尉
權隊將討浙西賊方臘破其衆又破河北賊累功轉忠
訓郎權涇原第十一正將夏人攻懷德軍以百餘騎突
擊追北斬首百四十有六轉秉義郎擢本路第十二副
將建炎三年金人內侵已三載矣春渡河出大慶關婁
宿殘長安鼓行而西跨鳳翔汧隴不決旬降秦州垂頭
熙河隴右大震熙帥張深遣偏將軍劉惟輔禦賊殺其
帥黑風大王婁宿失勢遁走深更遣隴右都護張嚴以



兵繼進嚴超鳳翔五馬坡下兵敗死之惟輔自鳳翔石
鼻寨遁歸熙州經制司統領劉延亮棄鳳翔歸曲端端
斬以徇端與侯大兵屯北原堅壁不動金人謀趨涇州
端拒守麻務鎮遣侯以前軍討賊侯進據青溪嶺逆擊
大破之轉武義郎涇原路兵馬都監知懷德軍令以本
道兵復華州城破將士無殺掠民皆安堵轉武功大夫
忠州刺史劇賊史斌寇興鳳據長安謀不軌侯進兵夜
龍其城斌出戰斬其首轉右武大夫四年春擢熙河路
馬步軍副總管金人謀取環慶大將婁宿以衆數萬攻
麻亭侯逆戰於鼓店彭士殊死鬪殺傷過當而曲端劾侯
違節制降武功大夫論者不直之未幾復故官改秦鳳
路馬步軍副總管知鳳翔兼權知永興軍路經畧安撫

使司公事進復長安轉右武大夫忠州防禦使先是侯
與曲端起兵涇原招流民潰卒捍禦金賊所過人供糧
糈道不遺拾猛士如林甲軍蔽野每戰必先占高原必勝
之地未嘗敗衄賊稍北退河東不敢逾河飲馬時朝廷
遣樞密張公董師川陝許以便宜不從中制樞密移檄
諸路將臣與賊大戰召端與侯問籌策端云平陽廣野
賊便於衝突而我軍未習戰須教士十年然後可以
大舉侯云高山峻谷我師便於駐隊賊雖驍勇甲馬厚
重終不能馳突我據嵯峨之險占關輔之勢賊雖强悍
不能據我尺寸地宣幕僚佐一以為迂緩一以為怯懦
置其言而不用棄其人而不親秋九月師次富平都統
制會諸將議戰侯曰兵以利動今地勢不利將何以戰

且從據高阜制賊馬衝突諸將皆謂不然云我師數倍
又前臨葦澤非鐵騎所宜都不聽既而賊驟至囊土逾
澤以薄我營王師大潰五路悉陷巴蜀大震侯獨整衆
保散關之東和尚原積粟繕兵列柵其上或謂侯宜進
屯漢中以守巴蜀侯曰賊不破我詎敢輕進吾堅壁重
兵下瞰雍旬彼懼我襲其後保蜀良策也越明年改元
紹興春三月金國沒立郎君率銳兵犯原上期必取而
後進侯擊敗之真拜忠州防禦使夏五月沒立及渾女
郎君馬五太師耿太師復會列將烏魯孛堇使二將由
階成出大散關先至侯與賊戰二日連勝而沒立方攻
箭苦關侯遣麾下擊退不使二將合分兵掩襲兩皆潰
去轉明州觀察使誥詞云朕以經理關陝付之樞臣奉

將天威式遏亂畧非有熊羆之士不二心之臣相與戮
力盡忠內撫外禦則戡定之期未可歲月而冀膚功未
奏懋賞是宜忠州防禦使秦鳳路經畧安撫使司馬步
軍都總管吳玠材氣不羣忠勇自奮策足功名之會騰
聲關隴之間比者擢帥涇原盡護諸將岐下之戰尤為
雋功獲其酋豪醜類折北是用酬其多捷陟以廉平夫
雄職美官朕所以待功能之士也益奮爾烈朕無憂焉
可特授前件官未幾丁母劉氏嘉國夫人憂起復尋兼
陝西諸路都統制誥詞云孝移於忠者聖人之格言國
爾忘家者人臣之彝憲而况分閫外之寄統諸路之司
淬勵以須枕戈待旦其可以親喪廢守觀察使吳玠比
以功伐浸階顯榮却敵有况果之機馭軍適威愛之濟

戰多由率懋賞既行遽深風木之悲方治金革之事矧
臨敵忘於易將而制閩庸於奪情其安厥常無曠爾職
苟能揚名於世以顯父母則孝忠之道兩得矣爾其勉
哉可特授陝西諸路都統制金賊自破契丹以來狃于
常勝至是與侯戰輒北不勝其憤冬十月其元帥四太
子會諸道兵及止甲女真數萬人造浮梁跨渭水自寶
雞連三十里疊石為城與侯拒戰侯指授諸將選勁弓
彊弩期以必死者休迭射賊少却則以奇兵乘險據隘
橫攻來擊如是三日度其必困欲走侯遣麾下伏神畝
峪待其歸敵果遁走伏發賊潰俘其部將羊哥大字董
及酋領三百餘人甲士八百六十人尸填坑谷者二十
餘里獲鎧甲數萬計乘夜併兵劫賊大寨四太子全軍

陷沒勦殺殆盡幾獲四太子拜鎮西軍節度使御前差
中使杜充賈詔就賜云兵勢無前用兼必勝之將王靈
克布允繫敵愾之威眷我虎臣時獻戎捷受盡護諸將
之任當兼總兩帥之雄控臨要衝過制親軼永念雍州
之域久罹羯虜之災屬敵勢之方張勵兵鋒而益倍陰
設奇伏躬率啓行俘當戶之衆首殄引弓之群醜威聲
遠暢凱奏上聞班勞策勲敢後酬庸之典建牙擁節益
隆制閩之權肆衍戶租仍加真食並頒徽數式示眷懷
於戲迪果毅于戎昭盡申威于武備乘戰勝之功行賜
山河之誓勉恭乃事圖報異恩可特授鎮西軍節度使
陝西五路都統制武功縣開國子食邑五百戶食實封
二百戶紹興二年兼宣撫使司都統制節度興文龍州

賊久窺蜀必欲以奇取之撒离喝與四太子懲前日之
敗不敢窺和尚原紹興三年春聚其兵三十萬又盡發
諸路簽軍聲言東歸太原反自商於出漢陰搃梁洋金
州失守侯亟率麾下騎兵倍道疾馳晝夜數百里急調
兵利閬徑趨金洋先以黃柑數百枚犒賊帥曰大軍遠
來聊奉止渴今日決戰各忠所事撒离喝以杖擊地大
驚曰吳侯爾來何速耶不敢進盤桓累日侯得以其暇
治饒鳳嶺之寨柵方據要險而賊已麾衆軍急上遂大
戰饒鳳嶺上凡六晝夜賊皆敗劔撒离喝大怒斬其千
戶李董數十人以死犯關又潛軍間道踰蟬溪嶺出官
軍後侯按兵夜徑趨西縣或曰蜀危矣侯曰賊掃地而
來去國遠鬪而死傷大半吾以全軍扼其吭蜀可無憂

侯遂為清野之謀分屯諸將示以擣虛之勢賊便旋行
中梁山浹月一夕旋遁撒离喝歸乃服侯善用兵勢不
能破因密遣通書百端間誘言金國威德之盛智勇之
奇甲兵之強公宜相時而動侯復書云玠謹白金國都
統足下遠蒙示書具審雅懷士各有主不容緘默彼已
之情不通空相猜貳無復平定時也輒摠寫悃幅用答
雅貺惟足下諒之夫華夷異分此天下大義古今常理
順之則治逆之則亂披觀傳記數千百年夷狄之亂中
華與大叛臣賊子稱兵犯順率不旋踵夷滅無遺類者
以其悖大義反常理神人憤疾天地不容也我 太祖
皇帝挺生五季遭時昏亂堅守臣節委質柴氏仗順討
逆功塞宇宙屬世宗棄代歷數有歸百萬之衆懽呼擁

戴不得已而君之不殺一士不墮一城與堯舜何異哉
深仁厚德布護涵養行二百年民至老死不識干戈上
下狃習武備不備戎器不備賊盜乘之郡縣瓦解至今
五六年而未定此蓋太平日久持盈守成失其道也而
謂全國威德之盛甲兵之強果能至是乎且全國行師
戰勝得志亦有由也陷城破邑縱士剽掠恣其所取卒
徒貪得鼓勇爭奮勝則勝矣而殺傷殘賊變動和氣亦
已甚矣以此用士利盡則士不可用以此決勝財殫則
戰不可必足下視今之天下何如遭焚燒者十不存一
二耕農失業商賈流亡餓死者相枕藉所謂財利何有
哉窮憂足下之兵自是不可以使足下之戰自是不可
以必勝足下亦可以少休哉乃復聚青徐之壤扶掖斗

筭之子伴擁虛器彼劉豫者嘗北面本朝備位臺省負
上皇拔擢之恩臨難畏懦不能以死報國而乘便抵間
僥倖非望三尺童子皆知鄙棄而唾罵之其尚何顏面
以視聽於天地之間望天下歸之耶然全國既以夷亂
華又挑賊豫以臣反君顧天下之大義古今之常理金
國盡掃除之矣而欲以靖亂不知適所以召亂也主上
聰明孝友慈仁恭儉聞於天下如奉使金國不能畱暨
京師之變適治兵藩間謳歌攸屬嗣位應天實太祖興
王之地天意昭昭可見矣維揚之役大兵奄至倉惶無
備中外失色然大駕南下橫衝風濤幾數千里如行衽
席廝役之卒無一不備而全國之士漂流沈溺者過半
此足以見天之不棄趙氏卒欲安全之也今乾象清明

星緯順行隆冬屆寒日星溫晏陽盛陰剝此中國之福
民心日以固士氣日以振太平可指日而俟以金國之
衆自稱多材豈無深明天道而不知審擇取舍安定天
下尚為前之紛紛果何為耶往者契丹與中國結為兄
弟驛牡相要天日是誓信使往來絡驛於道兩朝赤子
實便安之而我納邪人之謀忽棄載書墜失大信故上
天薄罰伐降此災戾然核其禍端窮其亂源鼓作交鬪金
國與有力焉如聞契丹仇怨金國深入骨髓渤海奚霄
從而和之將會名豪英糾集徒旅借援中國南北通歡
復尋舊盟并力合勢以逞憾於全國金國之兵暴露鬪
戰淹閱歲時力疲氣衰腹背受敵足下能保必勝乎暗
機會殞威名墮成功蔓後患資天下萬世口舌之士詆

薄訕笑金國獨何取也玠世為忠臣食趙氏之祿孕子
育孫於中原之地倘有二心天地鬼神實誅之乃辱貽
說使相時而動足下度玠豈苟得忘恥見利忘義者耶
一言之失駟馬莫及竊為足下惜之春律方初萬彙熙
泰惟逝去墳墓羈遊萬里之遠軍中倥傯頗安樂否更
冀加謹眠食以養新春和平之福玠白撒离喝得書大
不平日與諸將熟議攻玠紹興四年春二月賊復大入
撒离喝四太子蓄忿日久糾合兵數十萬轉三河之粟
魚貫蟻附決意取蜀自元帥以來下皆盡室以來又以劉
豫腹心為招撫使召諸路簽軍列屯寶雞綿亘數百里
進攻鐵山鑿岸開道於仙人關高嶺上五大寨下瞰侯
營循嶺東下直攻侯軍侯自以萬人當其前公弟總管

侯璘由七盤關不待會合率輕兵倍道入援其兄四太子聞之與皇弟郎君分領萬戶酋長擁兵急攻又往攻殺金坪野砦對壘劄連珠砲砦數十座又來侯營前立砲數座擊我營侯令營中併發神臂弓飛天砲斃賊無數統制官田晟總兵深入追賊賊又發生兵萬餘擊營左侯分兵力戰却之賊不住又賊生兵擁洞子雲梯直前攻城侯兵向前用砲打洞子碎用撞竿雲梯倒賊怒縛虛棚戰樓別遣大字董擁銳卒萬餘一發乘城侯令統制官楊政領長鎗防刀手深入刺打隔斷賊又遣二李董總正甲金人二萬來攻寨兩肋吳璘左右遮護血戰殺賊皆引却撤高喝駐馬四顧良久云我得之矣翌日號令諸將併力只攻侯營兌方一樓子自寅至午

危甚姚仲為統領只在樓上酣鬪樓已傾側仲以絹為繩繩使復正賊以火焚樓柱仲以海壺擊滅火賊布神臂弓東嶺下侯亦發神臂弓五百隻與之對射賊去即遣王萬年劉鈐轄潘水王武宣贊分紫白旗入賊賊奔潰抵夜侯別遣五將分更劫寨晝夜數十合金人困憊死傷以萬計即斂兵宵遁殺千戶甲軍萬餘得傍牌銃槍金鼓旗幟數千件左軍統制張彥夜劫賊橫川砦斬首千級生擒將領二十人侯又遣統制官王俊設伏河池扼賊歸路生擒百餘人斬首級千餘得甲馬旗幟無數侯悉兵尾襲直過和尚原去上聞之嘉歎賜以親札云史謂趙克國沈勇有大畧其用兵以全師保勝為策乃漢中興良將也朕常思其人以濟大業比見宣撫

使司奏金人擁大兵而來有吞噬四川之心卿能保關克敵挫彼虎狼之銳而壯晚復興之威非謀以濟勇者能若是耶朕之所思今乃見之但恨阻遠不得撫卿背而慰朕心也更在不驕其志益勵軍情則所謂濟朕莫大之業者非卿而誰耶已降親筆除卿宣撫使及繼以朕所御戰袍器甲等物賜卿想已畢達今朝廷議賞典先飛此數字聊寫朕懷金人久不得志則還據鳳翔授甲屯田為久留計自是不敢輕動侯以熙河經畧司關師古自洮岷領選鋒統制李進前軍統制王師古後軍統制戴越打糧河州襲大潭縣掩滑谷縣賊慕洎拔寨去師古由殺馬谷攻焦山務焚田家村圍子午谷深入賊境至石要嶺忽遇金賊大兵一戰敗績師古旋師大潭

內懷慚懼悉還兵宣司隻身往降賊侯愛此軍忠義無一人一騎從師古叛者撫存勞徠捐其家厚資給之兩軍既合中外一心失一匹夫於師古得萬貌貅於行陣侯由此兵精甚四月從鎮定國除川陝宣撫副司秋七月朝廷錄仙人關功進檢校少師奉寧保靜軍節度使五年春侯復向天水出奇兵下秦州六年兼營田大使從鎮平保知靜難軍侯與金賊對交戰踰十年熟其軍壘曲折知其部領堅脆常以一當百惟患遠餉勞民屢汰冗員節浮費歲屯田至十萬斛又調戍兵命梁洋守將治褒城廢堰廣溉民田復業數萬朝廷嘉之下璽書褒賞七年冬賊廢劉豫台諸道兵聲言入蜀侯獨謂不然策其將_去至已而果然和議成上以侯功高賊親札進

開府儀同三司四川宣撫司而侯已疾自以賞過其功
固辭優詔不許九年春三月侯以疾革乞解事天子惻
然憂之命成都守胡世將訪蜀善醫者治其疾又馳國
醫往視未至而侯以六月己巳薨於軍享年四十七歲
己亥遺表聞上震悼輟視朝特贈少師九月丙申其弟
璘奉喪葬於德順軍水洛城十一日戊申上念功不已
賜錢三十萬擢璘龍虎衛四廂都指揮使以慰恤其家
侯能撫士卒同甘苦至軍政則斬刈一不旁貸故人人
効死如建炎二年曲端屯麻務鎮督戰侯遣列校三百
七十餘人於大谷比較嶺逆戰矢石未交望風奔潰伏
匿山谷四年侯招兵秦鳳前三百四十餘人出赴招安
侯問訊再三搜索非是者五六人斥遣之餘三百七十

人悉斬於邊亭下去秦州十里士卒股慄自是出戰人
皆効死至第功賞則維以公論無請託之私性樂善每
觀史傳有可師者必書之座右日誦幾過其用兵本孫
吳而能窮其變化雖功高位顯而居常極儉約至推以
予士則畧無少吝其歿也家無餘貲至無宅以居三子
拱右武郎扶攜皆為文官承奉郎以經史自娛庭傑嘗
試論之曰漢皇甫規張奐皆生長山西應賢良中高選
規以詩易傳授門弟子三百餘人奐著尚書疑難五十
餘萬言以垂世設教二公尚武棄文俱任度遠將軍破
胡虜以千萬計觀規自布衣時西羌深入上書願假近
邊無用坐食之兵五千使規為將上可以除患下可以
納降奐每言大丈夫處世當為國家誅滅胡虜嘻此皆

前輩豪俊語邇者 天子知元通與吳侯相知之深想
吳侯諸子必皆稔聞今元通功高言重若他日會晤吳
侯一家當語之曰山西出將二公家世邊人將門出將
二公奕世將種大丈夫當用長鎗大劍定天下安從文
官學弄筆墨也元通曰然後民論議極有補於世當併
為我書於吳侯傳末云宣撫司薦士明庭傑記

右見三朝北盟會編卷第一百九十六

吳武安公功績記序曰忠烈吳武安公中興名將其撫
養士卒似吳起其勤儉精力似陶侃違令必戮似孫武
子憂國遠計不僥近功似趙充國身歿之日知與不知
莫不流涕又似李廣羊祜也是以能勝所難勝守所難
守以保全蜀使有數年之壽則中原之復可幾也方其

薨也其長子未冠而二季尤幼胡宣撫述行狀不詢其
子使二舊吏立供為之墓誌又據行狀而作是以如是
之不詳乾道己酉余既作補遺志其大者凡數十事以
遺其少子參議且類宸翰詔命碑鏤為一集目之曰保
蜀忠勤庶備國史異時采擇因使蜀士大夫知本末而
後之為大將者有所矜式書成人喜讀之薦紳傳道已
滿四方然意尚有遺也近得明廷傑從政所撰功績記
文實語詳果有未聞知者詢其來由則云方忠烈用兵
渠在張魏公幕府親所聞見宣使參議馮康國元通命
記其事是可信也因鏤之集中以補遺焉岐下張發書

右見三朝北盟會編卷第一百九十五

中書舍人王綸為公墓銘曰公諱玠字晉卿世居德順

之隴干公少沉毅有志節善騎射知兵讀書能通大義
未冠以良家子隸涇原軍政和中夏人犯邊力戰有功
自是威名益振建炎二年金人內侵已三載矣春渡河
出大慶關畧秦雍所過城邑輒下三月還自鞏州至鳳
翔隴右都護張巖邀戰失利敵勢愈張謀趨涇州大將
曲端拒守麻務鎮命公為前鋒公進據青溪嶺逆擊之
破之敵始有憚公意三年冬劇賊史斌寇興鳳據長安
謀為不軌公擊斬之轉右武大夫四年春擢涇原路馬
步軍副總管金人謀取環慶大將婁宿以衆數萬出麻
亭公逆戰於彭店原士殊死鬪殺傷過當敵懼引去而
曲端劾公違節度坐降武顯大夫罷總管論者不平未
幾復故官職改秦鳳路馬步軍副總管知鳳翔府兼權

永興軍路經畧安撫司公事進復長安宣撫處置司將
合五路兵與金人決戰公謂宜各守要害以待其敝秋
九月師次富平都統制會諸將議戰公又曰兵以利動
今地勢不利何以戰宜據高阜先為不可勝者衆曰我
師數倍又前臨葦澤非敵騎所宜不聽既而敵驟至囊
土逾淖以薄我營軍遂大潰而五路悉陷巴蜀大震公
獨整衆保散關之東曰和尚原積粟繕兵列柵其上或
謂宜屯漢中以安巴蜀公曰敵不破我不敢進堅壁重
兵以臨之彼懼吾弭其後保蜀之道也明年改元紹興
春三月敵將沒立果率銳兵期必取而後進公擊拜之
真拜忠州防禦使兼帥涇原夏五月沒立復會別將烏
魯折合衆數萬使二將由階成出散關先至公與之戰

三日大敗而去沒立方攻箭筈關公復遣麾下擊退卒
不得與二將合轉明州觀察使丁嘉國憂起復尋兼陝
西諸路都統制敵自破契丹以來徂常勝至每與公戰
輒北不勝其憤冬十月其元帥四太子者會諸兵十餘
萬造浮梁跨渭水自寶鷄連營三十里又壘石為城夾
澗水與官軍相拒公指揮諸將選勁弓弩號駐隊番休
迭射矢發如雨敵稍却則以奇兵旁擊如是三日度其
困且走則為覆於神岔谷待其歸覆發衆大亂俘其將
羊哥孛董及其首領三百餘人甲士八百六十人尸填
坑谷者二十餘里獲鎧仗數萬計拜鎮西軍節度使二
年兼宣撫處置使司都統制節制興文隴州敵久窺蜀
必欲以計取之三年春裒其兵又盡發五路叛卒聲言

東去反自商於出漢陰擣梁洋金州失守公亟率麾下
倍道疾馳且調兵利閬既至適與敵遇使人以黃柑遺
其師撒离喝大驚曰吳公來何速耶遂大戰饒風關凡
六日敵皆敗殺傷不可勝計撒离喝怒斬其千戶孛董
數人以死犯關出官軍後公徐結陣趨西縣或曰蜀危
矣公曰敵去國遠鬪而死傷大半吾方全師以制其敵
蜀何憂也月餘敵果退加檢校少保克利州路階成鳳
州制置使四年春二月敵復大入犯仙人關公預為壘
關旁曰殺金坪嚴兵以待敵據阜且戰且攻壘公將士
更射又出銳兵擊其左右戰五日皆捷敵復遁去上
聞之嘉歎賜以親札曰朕恨不撫卿背也是役也敵決
意入蜀自其元帥以下皆盡室以來又以劉豫腹心為

四川招撫使既不得志度公終不可幸勝則還據鳳翔授甲屯田為久留計自是不復輕動矣夏四月徙鎮定國除川陝宣撫副使七月錄仙人關功進檢校少師奉寧保靜軍節度使五年春攻下秦州六年兼營田大使徙鎮保平靜難軍公與敵對壘踰十載常患遠餉勞民屢汰減冗員浮費歲益屯田至十萬斛又調戍兵命梁洋守將治褒城廢堰廣溉民田復業者數萬家朝廷嘉之每降璽書褒諭七年冬敵廢劉豫且益兵眾以為疑公策其將去九年春和議成上以其功高復賜親札進開府儀同三司四川宣撫使遣內侍齎詔以賜而公已病甚扶掖聽命自以賞過其勞固辭優詔不許六月己巳以疾薨於仙人關治所享年四十有七公用本孫

吳而能知其變務遠大不求近效故能保其必勝御下嚴而有恩視士卒之休戚如己而同其甘苦故人樂為之死其任將佐等功賞斷以公論無親故權勢之徇故麾下諸將佐多以功顯既貴而自奉之約不逾平時至推以予士則不吝故家無貲至無宅以居嗚呼雖古名將何以加諸後胡世將為川陝宣撫使公弟吳璘適在軍中一日從容問公所以戰則曰璘與先兄東髮從軍屢戰西戎不過一進却之間勝負決矣至金人則勝不追敗不亂整軍在後更進迭却堅忍持久令酷而下必死每戰非累日不決蓋自昔用兵所未常見勝之之道非累與之戰者莫能盡知然其要在用所長去所短而已蓋金人之弓矢不若中國之勁利而中國之士卒不

若金人之堅忍盡我長技洞重甲數百步外則彼固不
能及我據其形便更出銳卒與之為無窮以阻其堅忍
之勢則我固有以制彼至於決機兩陳之間變化如神
默運乎心術之微則璘有不能言以是知公之深於兵
也十年詔立廟於仙人關賜額曰忠烈謚曰武安焉

同上



